

MAR 26 1 01 AM '76

AIR NIUGINI BIKPELA NAU



Dispela bikpela foa ensin smokbalus, nem bilong em kumul ("Bird of Paradise" long tok Inglis) em i bikbrata tru bilong ol 23 kain kain balus bilong Air Niugini.

Dispela kain balus ol i kolim Boeing 720B. Em i ken karim inap long 148 pasindia na i save flai moa olsem 585 mail long wan aua.

Long 7 Februeri dispela balus i bin kam long Englan

na ol i bin traim nabaut long Australia. Na long 13 Februeri em i stat long karim ol pasindia i go long Australia na Filipin Ailan.

Ol pailot na ofisa em ol i bilong sampela bikpela ealain

bilong Englan na Australia. Ol hostes o meri i wok insait long balus, em ol sampela i bilong Filipin Ailan na 13 i bilong Papua Niugini stret. Mis Brenda Newton bilong Englan i bin trenim ol.

Dispela smokbalus em i bilong Tempair Kampani bilong Englan. Air Niugini bai yusim inap wan yia. Balus ya nau i save flai na soim plak na nem bilong yumi long ol kantri ausait.



PAS I KAM LONG EDITA

OLSEM TAIM BIPO NA NAU'

Dia Edita - Dispela em i wari bilong mi.

Pastaim Gavman i tok long yumi kisim Independens dispela taim bai yumi senis na olgeta samting bai yumi kisim yet long Australia. Tasol Australia i no laik long helpim yumi moa, mi lukim provins bilong mi Wes Sepik i stap olsem yet na ol tu i slip olsem yet na kaikai saksak yet, slip long haus morota tasol.

Ating Is Sepik Provins wantaim sampela provins i senis pinis. Mi lukim tu olsem Westen Hailans, Enga, na Saten Hailans provins, ol dispela tu i no senis. Ol i stap olsem bipo na mi lukim ol manmeri na pikinini tu i stap olsem bipo. Na yupela i tok long kantri i senis. Mi no bilip long dispela.

Gavman i mekim dispela kain na planti toktok i kamap long Papua Niugini.

Em tasol wari bilong mi.

I.T.Alyo,
Lumi/WSP.

KALA NA LOTU

Dia Edita - Planti taim mi save lukim ol sampela waitskin manmeri i no save go long lotu long taim bilong Sande.

Long wanem dispela kantri bilong yumi Papua Niugini, em i waitskin manmeri i bringim tok bilong God i kam long yangpela kantri bilong yumi PNG. Na i no gutpela long wan wan waitskin manmeri i go long lotu na planti wanskin i go long laik bilong ol yet olsem.

Mi yet tu save lukim long skul bilong mi yet na i no gutpela long mi. Plis inap yupela o husat man o meri i ken bekim dispela askim bilong mi.

Lowambe Opa,
Lae.

PABLIK SEVAN KRAI

Dia Edita - Yupela ol Pablik Sevan i krosim Mista Michael Somare long apim pe bilong yupela.

Tasol yupela i tingting pastaim. Gavman i no longlong man, gavman i makim hamas aua long wok orait gavman i ken givim yu pe stret na i no ken yu yet singaut long bikpela pe oltaim. Ating yupela Pablik

Sevan i laik sindaun olsem king o kwin.

Yupela i mas tingting gut pastaim mipela Papua Niugini i kisim independens pinis na em i taim bilong mipela yet i mas wok hat long kirapim kantri bilong yumi i go het gut olsem na yupela i no ken singaut long mani oltaim.

Adiokus,
Madang.

WOK BEMBE

Dia Edita - Mi save lukim planti pipel hia long Ramu i save mekim wok bembe. Na ol i save trikim ol pipel long ol ples, bai mani i kamap nating long matmat na long ol meri.

Mi laik tok klia tu long dispela samting. Mi no amamas tumas long ol dispela kain wok, i wok long bagarapim tingting bilong sampela manmeri.

Gavman i no gat pawa bilong kotim ol man i mekim wok bembe? Mi save harim planti man i tok, gavman i save long ol dispela wok pinis.

Tasol yumi save, gavman i as tru bilong mani. Olsem na yumi i no ken daunim nem bilong gavman na kirapim ol wok long laik bilong yumi yet long kamapim mani nating.

David Umake,
Kwanga/Ramu.

Raitim pas na salim i go

long: WANTOK

BOX 396

WEWAK

HARIM OLPELA KAIN PLISMAN

Dia Edita - Mi O.I.C. Konstopal Pes Klās Sui Walol. Mi bin sain long plis long yia 1958.

Nau mi i stap olsem O.I.C. long Yapsei, Bes Kem. I no gat kiap i stap wantaim mi. Mi yet mi bosim dispela Bes Kem klostu long Wes Irian.

Mi i no skulman olsem yupela sampela plisman. Nogat. Mi wok long het bilong mi tasol.

Yu husat yangpela man yu lukim dispela toktok bilong mi, yu mas strong na bihainim ol dispela wok o pasin bilong mipela olupela plisman bambai kantri bilong mipela i ken kamap gut.

Em tasol liklik tok bilong mi. Mi bilong Maprik Sab Provins.

Konstopal Sui Walol
Telefomin.



MISIN I PINIS LOKAL SIOS KAMAP

Dia Edita - Wari bilong mi i go long wari bilong mipela ol katekis.

Katekis i stap namel nating. Nogat papa, mama, lain peris pris, bisop i kikim i go long pipel na pipel i kikim katekis i go long misin. Olsem wantok ya Adam K. Wanguman i tok long namba 12 long Wantok Niuspepa.

Em i stret, em i wari bilong mipela olgeta. Mipela i no inap daunim man i autim wari bilong em.

Mipela save long bilip em i wanem. Bel isi, daun pasin. Mi lusim wok tu mi ken mekim dispela wok. Em i no wok bilong katekis tasol. Tasol hevi bilong wokman i no klia. Olsem na plnati katekis i pilim hevi. Husat i tok katekis i no ken wari long mani? Mi no bilip.

Dispela man i painim we bilong helpim em pinis na em i amamas long wok bilong em. Na em i kisim wanpela nem o wok i antap long ol arapela katekis. Olsem em i amamas na i no wari. Bilip i no ken hangamap nating long man. Bilip em i mas i gat samting i stap bihain na i tok. "Yu bilip na wok bai samting i kamap." O samting man i lukim na em i pilim amamas na em i go het long wok.

Papua Niugini em i save mekim lotu tumbuna na bilip long got bilong ol i gat mak save bilong bilip na lotu bilong tumbuna. Ol i no wok tasol. Ol i laik kisim nem nau tasol.

Yumi ol kristen i no wok long nau tasol. Nogat. Nau na bihain tu. Olsem man i mas lukim samting bilong nau bilong bel krai bilong dispela graun. Bilong wanem God i mekim man na i putim man-long dispela graun? Em i mas wok long mekim graun i mas kamap gut. Man i no Angelo i gost. Yumi wok long dispela graun

orait yumi mas kisim amamas tu bilong dispela graun.

Olsem ol wantok katekis, pris, brata, sista, sios lida. No slip. No ken bihainim tumas olupela aidia na daunim tumas ol man i pilim na i autim wari. Taim nau bilong Papua Niugini pipel i mas stiaim, lukautim sios nau. Taim bilong putim hevi i go long ol waitman em i pinis. Taim misin pinis nau, lokal sios i kamap.

Wok wantaim na putim Kraiss bilong P.N.G. Olpela aidia i pasim tumas man na i no pulim Kraiss God i kam klostu. Putim God longwe tru. Tok long samting man i no pilim i klia, subim tasol bilip long ol man. Ol i no gat mining. Olsem man i dai na subim kaikai long maus. Nogat. Sios i mas painim laip nau. Em tasol.

Yu pilim ol tok bilong mi i sutim bel bilong yu, mi i amamas tasol long lukim long Wantok Nius. Tenkyu.

Kondwagai Ambrosius,
Bogia/Madang.

BEKIM PAS BILONG DOKTA

Dia Edita - Tenkyu tru, brada, yu bekim dispela pas na tok klia long wanem we yupela save givim marasin long helpim ol mama long karim planti pikinini, i sotim blut bilong ol.

Tenkyu. Yu tok klia, Tenkyu, Brada.

I gat arapela tok, yu save long tok bilong God taim em i mekim manmeri na blesim tupela na i tok yutupela mas karim planti pikinini bai graun i pulap long man, yupela mas tingim tok bilong god.

Jose M.
Maprik.

SLIP NATING NATING

Dia Edita - Mi lukim wanpela samting i no stret long mi. Bilong wanem?

Mi lukim planti, planti meri tru, ol i kam na askim dokta long stopim bel bilong ol, ol meri karim 4 o 5-pela pikinini na ol i tok bihain ol i no laik karim moa. Dokta i stopim we bilong karim pikinini olgeta. Bilong wanem ol meri i mekim dispela pasin?

Bilong wanem god i wokim man na meri? God i wokim man na meri bilong kirapim pikinini. I no bilong giaman na wok nating, nating nogat.

Dispela pasin i rabis tru, na i no stret long ai bilong god. God i givim dispela pikinini yu mas karim dispela pikinini. Yupela i stopim pikinini, manmeri i holimpas na slip nating, nating. Nogat sem bilong yu stret.

Joseph Ba,
C.M. Kundiawa.

baim buk na samting bilong ol pikinini bilong yumi. I tru ol i kisim gran in eid long gavman, tasol ol yet i putim tu.

Hia gen, brata Noma, nau yu ken lukim ol i mas gat stua na sip na balus bilong helpim ol long painim mani bilong helpim mitupela na ol meri pikinini bilong yumi na ol pipel bilong kantri bilong mitupela.

Orait, brata Noma, yu klia nau laka? Yes tru, sapos ol kristen manmeri bilong Papua Niugini i save givim mani long ol misin, na ol i mekim bisnis olsem yu tok, bai mi tumi ken helpim yu long tok.

Walfgang Sauci Kovingre,
Warabung.

WATPO MISIN MAS HELPIM EM YET

Dia Edita.- Hia mi laik bekim leta bilong Noma Kespak bilong Saidor.

Bras, yu save tu hamas mani ol misin i lusim o i save lusim long ol marasin na long skul na ol arapela samting bilong developim kantri bilong yumi? Sapos i gat misin klostu long Saidor plis mi laik bai yu go na askim ol.

Lukim bras, ol misin i no gat as tru bilong painim mani bilong mekim ol dispela kain wok. Long ples bilong ol, long Yurop, ol kristen i save givim mani long ol misin.

Long Papua Niugini tasol i arakain olgeta. Ol misin yet i baim marasin bilong ol na bilong mipela tu, wokim skul,



TU MINIT TINGTING

SKIN KRISTEN

"Ol man i harim nating lo, ol i no gat nem stretpela man long ai bilong God. Nogat. Ol man i bihainim lo, bai ol i kisim nem stretpela man." (Rom 2:12)

Dispela tok Santu Pol i sutim i go long ol manmeri ol i skin kristen tasol. Em i min ol i gat nem kristen; tasol pasin bilong ol i abrusim pasin kristen olgeta. Ol i kisim baptais pinis, tasol ol i no bihainim promis ol i bin mekim long bihainim lo bilong God.

Sapos yu askim ol, bai ol i tok hariap: Yes mi kristen. Na yu askim tu: yu save pre? Ol i tok: Nogat. Yu save lotu? Nogat. Yu marit long pasin kristen? Nogat. Na yu ting yu kristen? Yes.

Dispela kain tingting i rong; man ya i no kristen; em i lusman tru. Em i harim nating lo; tasol em i no bihainim - olsem Pol i tok antap.

Lo bilong laip bilong yumi i go olsem: i no gat wanpela samting i save kamap nating. Yu laikim gaden, yu mas planim. Yu laikim rot, yu mas wokim. Yu laikim klos, yu mas go baim. Yu laik kisim save, yu mas skul. Yu laik pulapim bel, yu mas kaikai. Yu laik stretim sik, yu mas kisim marasin.

Inogat wanpela gutpela samting i save kamap nating. Heven tu i no ken kamap nating.

Olsem Jisas yet i tok long narapela ples: "I no olgeta man i save singaut nating, 'Bikpela, Bikpela' bai kamap long kingdom bilong heven. Nogat. Man i bihainim laik bilong Papa bilong mi i stap long heven, em tasol bai i go insait long kingdom bilong heven." (Matyu 7:21)

Yu no ken ting baptais em i olsem wanpela tiket inap long baim dua bilong heven. Nogat tru. I no gat kain tiket olsem. Baptais em i putim yu long maus bilong rot i ken bringim yu i kamap long heven. Tasol yu yet yu mas wokabaut long dispela rot. Yu no ken sindaun nating long arere na wetim wanpela PMV. I no gat PMV; na yu no ken baim rot. Yu yet yu mas taitim bun bilong yu yet na wokabaut i go.

Sori. Em i lo bilong dispela samting.



Kampani helpim ol Kiunga pipel

Poto antap i soim bikpela pang, nem bilong em SIR ALAN. Em i bilong Marine Haulage and Storage Kampani bilong Port Moresby, na i bin bringim fri wanpela trakta na trela i go insait long bus, antap long het bilong Fly Riva klostu long ples Kiunga.

Pipel bilong Menemore Viles i bin bungim mani na Developmen Beng i bin dinau long ol bilong baim dispela trakta tasol Beng i laik painim rot bilong bringim i go insait long bus tru. Tasol nogat. Bihain kampani ya i bin tok orait na i bin bringim fri. Em i longwe moa.

Ol pipel i laik yusim bilong bringim kago na pasindia i go i kam long rot namel long Kiunga na Rumginae.

Ol pipel yet i bin winim mani long wok raba; na planti tisa bilong ol i wok nabaut long kantri i bin salim mani i kam long statim dispela Viles Ekonomik Fan bilong Mememore.



EM HIA WANPELA NUPELA TESTAMEN LONG TOK INGLIS, EM OLGETA MAN I WINIM STANDET 6 INAP LONG RITIM.. Em i kostim 75t. tasol.



WEWAK CHRISTIAN BOOKSHOP
Box 169, Wewak
MT. HAGEN CHRISTIAN BOOKSHOP
Box 78, Mt. Hagen

TEACHERS' CORNER

F O R E S T R Y : BROADCAST FOR STANDARD VI. (25.2.76)

T I M B E R : BROADCAST FOR STANDARD IV. (31.5.76)

These supplementary hints and information should be useful.

SOURCE MATERIAL : JANT, P.O. BOX 174, MADANG
SOCIAL STUDIES KIT PICTURES: 75,76,77,78,79,80.


Suggested questions to use with the pictures:

75. What kind of climate do you think these trees grow in?
When a tree is cut down, how is it taken out of the forest? Where would it be taken to?
76. What are the bare spaces behind the truck?
Is there anything growing there? (Introduce the term "re afforestation" which means replanting young trees when other trees have been removed.)
Where do the young trees come from? (Introduce term "tree nursery" where tree seeds are planted and grow into young trees.)
77. What's happening here?
78. What's this machine doing?
79. What have we here?
80. What special work is this machine doing?

Places in PNG where timber is grown: Bulolo/Wau, Kimbe, Madang/Gogol River, Vanimo, Ialibu.

Uses of timber: Children make suggestions, and you can choose some familiar uses from the list below.

<u>LUMBER</u>	<u>PLYWOOD</u>	Insulating paper
Baseball bats	Boats	Newsprint
Bowling pins	Boxes	Wallboards
Boxes	Concrete forms	Wrapping paper
Building materials	Furniture	Writing paper
Crates	Table tops	<u>SAWDUST</u>
Floors	<u>TIMBER</u>	Artificial leather
Furniture	Bridges	Artificial wood
Pallets	Building foundations	Filters
Pencils	Piers	Glues
Railroad cars	Ships	Insulation
Shoe heels	<u>GROUNDWOOD PULP</u>	Packing
Window frames	Boards	Plastics



Blackboard skills


Your blackboard and chalk are your most important aids.
Use them for: (1) Preparation - guide - memory aid.
(2) Record of lesson - summary.
(3) Illustrations.

REMEMBER: YOUR BLACKBOARD WRITING IS THE MODEL FOR YOUR CLASS

H I N T S F O R G O O D B L A C K B O A R D W O R K

- (1) Have a copy of letters in correct script or cursive style along the top of your blackboard, so both you and the class can quickly refer to it.
- (2) Rule lines for all work as in children's books - especially in the lower classes.
- (3) Firm downstrokes and light upstrokes improve the appearance of your written work. Form the letters in the same way and order as down below.
- (4) When preparing your lessons, plan ---
(a) What you will have on your blackboard.
(b) How you will set it out.
(c) To leave some "working" space.
(d) Where you will stand.
(e) How you will refer to and use the b.b. during the
- (5) Make use of coloured chalk. / lesson./
- (6) A quick illustration on the b.b. often saves many words, and "explains" clearly.
- (7) Always use the eraser when "rubbing out".

For your guidance here is a copy of script letters and the order of lines.



Bilong wanem

famili bruk

Bipo tru, i gat wanpela meri wantaim tupela pikinini bilong em ol i stap long wanpela ples. Dispela ples i no longwe long Goroka. Ol pikinini ya, wanpela i meri na wanpela i man. Tupela liklik tru.

Ol birua i bin kilim papa bilong ol na ol tasol i stap. I no gat papa long lukautim ol. I no gat man tu long wokim gaden na tu helpim ol. Nogat tru. Ol i gat liklik kaikai na tu no gat samting long karamapim skin bilong ol, samting olsem laplap na siot. Em na ol i kamap rabis olgeta.

Wanpela taim ol tarangu i no gat samting long kaikai long dispela de. Na mama i wari nogut tru. Wanem samting tru, ol liklik bilong em bai kaikai? Em i tingting i go nau em i tokim ol pikinini long i stap na em wanpela bai i go painim kaikai. Tupela i stap nau em i go long bikbus.

Tasol long dispela hap i gat ol draipela man bilong bikbus ol i save kaikaim ol pipel. Plantitaim long bipo ol i bin kilim na kaikai sampela pipel. Em nau olgeta pipel bilong dispela hap i pret olgeta na i no save raun wan wan long dispela hap.

Mama ya i soim wanpela diwai banana i sanap klostu long haus bilong ol. Em i tok: ples ya, tru i gat birua, tasol i no gat kaikai tru na mi laik i go ya nau!

Em i tok olsem pinis nau i kirap na sori sori wantaim i go long ples bilong painim kaikai. Dispela ples i longwe moa moa yet tasol em i no pret, em i go tasol. Em i tingting long painim pis pastaim long

ston bilong tumbuna



painim kumu wantaim sampela kaikai. Em i bihainim wanpela wara i go antap long het. I no longtaim em i bungim wanpela lapun man. Dispela man i wok long sindaun long as diwai na wok long sapim tamiok ston bilong em i stap.

Meri i tingting planti na em i wari. Nogut man ya i kilim em. Em i hangre nogut tru i stap. Olsem taim meri i kamap em i askim. "Eh meri! Yu i gat sampela kaikai?" Mi hangre nogut tru. Lapun meri i givim sampela pis nau long en. Hangre man ya kwiktaim tasol daunim olgeta na askim long sampela moa. I no longtaim, olgeta pis bilong meri i pinis. Man ya i kaikai olgeta.

"Yu laik i go olsem wanem nau?" Em i askim meri. "Yu laik bihainim mi o yu laikim mi bihainim yu?" Lapun meri i pret na i tingting planti. Bihain liklik

em i tok em bai bihainim dispela man ya.

I no longtaim, tupela i painim narakain yam long gaden. Em i tokim meri: "Dispela em narakain yam, tasol yu nogat kaikai olsem na yu mas digim. Tasol em i tok, "Yu mas lukaut gut long i no ken tru brukim yam long namel. Sapos olsem i nogut long yu nau.

Meri i stat na digim i go daun. Man i holim tamiok bilong em na em i was gut tru i stap.

Tarangu meri i traim hat tru na digim gut i go daun. Tasol yam i gro

i go insait tru na i hat moa yet long em i digim. Daumbilo tru ya, yam i luk olsem pinis. Em nau meri i mekim nais nau asua long em, yam i bruk. Man! Lapun man i bel hat nogut tru: em i tok, "kaman digim aut olgeta hap bilong yam".


Kwiktaim tasol man i kirap katim nek bilong meri ya na tarangu i dai. Na em tu i pret na hariap tasol planim em nau lusim gaden na rana-we i go pinis olgeta. Em i no moa i stap hia.

Peter Emong,
Raipinka/Kainantu.

Wes Nu Briten laki provins

Em hia ol sampela toktok bilong Praim Minista i bin givim long ol pipel bilong Wes Nu Briten Provins, taim em i go lukluk raun long las mun.

Em i tok Wes Nu Briten Provins em i laki provins tru, sapos yumi skelim wantaim ol narapela provins long PNG. Dispela provins i bin go het gut tru i kam inap nau, na i wok long go het moa yet long olkain developmen. Em i tok yupela i no ken krosim gavman long prais bilong wel. Em i wok bilong bikpela wol maket yet i save wokim prais.



* Poto long lephan i soim wanpela blakskin man bilong Australia, Mista Wandjuk Marika, i holim wanpela piksa bilong bipo i makim stori bilong kamap bilong dispela wol bilong yumi i stap nau.

Oltaim Mista Marika i save bungim ol kain kain kaving bilong ol tumbuna bilong em long bipo, na em i save penim ol gen long mekim ol i luk nais.

Wandjuk Marika i kam long Irrkala long Noten Teritori. Nau em i wok long bikpela haus ol i save penim ol kain kain kaving ol i kolim Art Gallery long Nu Saut Wels, na tu long Macleay haus kaving long yunivesiti bilong Sydney.

Long mekim dispela wok bilong em i go het, Mista Wandjuk Marika i bin kisim sampela helpim i kam long lain ol i kolim Aborijinal Art Bot bilong Australia Kaunsil. I no longtaim i go pinis, em i bin mekim tupela wik lukluk raun long PNG.

Kimbe pipel win moa yet

Long Februeri long Barry Holloway, spika Kimbe ol i bin opim nupela haus sik na bisnis divelopmen senta. Kimbe i kamap gut long wanem ol pipel i gat

Sir Paul Lapun, Minista bilong Helt, i amamas tru long nupela haus sik. I tru gavman i bin givim K150,000 long en; tasol planti wok moa ol pipel yet i mekim.

Taim ol i opim nupela bisnis senta, Mista

bilong Palamen, i tok: Kimbe i kamap gut long wanem ol pipel i gat graun na i gat olkain samting bilong kirapim bisnis. Em i isi tumas long go statim bisnis bilong smokim pis.

Long tingting bilong em, wanpela samting tasol i rong: i gat planti tretstua tumas nabaut.

PNG laik kirapim simen bisnis

I no longtaim i go pinis, Minista bilong Leba, Bisnis na Indastri, Mista Gavera Rea, i bin tok, liklik taim Papua Niugini bai i gat faktori bilong wokim simen bilong em yet.

Em i bin tok tu olsem, Blu Sekal Sauten Simen Kampani bilong Australia na Hyundai Konstraksen bilong Saut Korea bai i helpim PNG long kirapim simen bisnis. Tupela kampani hia i wok long lukautim gutpela hap ples long wokim dispela simen faktori long hia.

Gavman i no inap long toktok inap longtaim ol i kisim ripot i kam


long tupela simen kampani long dispela wok.

Ripot i kam long Hyundai Konstraksen na i tok olsem, bai ol i stap tingting gut long dispela pastaim. Na Blu Sekal Simen Kampani i bin tok em bai i salim ripot bilong em i kam long pinis bilong mun Mas long dispela bisnis.


Mista Rea i bin tok olsem tu, em i ting bai Blu Sekal Simen i gat planti wok bilong mekim long taim em i wokim faktori. Olsem na i gat planti wok bilong ol lokal pipel long mekim long dispela taim yet. long dispela wok.

* Poto long raithan i soim helpman bilong Mista John Callaghan bilong Perth, long Westen Australia. Nem bilong helpman hia em i Sikau. Tasol oltaim ol i save kolim em long arapela nem bilong em John i bin givim em ol i kolim, Dino.

Dino i gat 24 krismas bilong em. Wok bilong Dino em long karim ol pasel na pas samting i go long pos ofis. Yu ken lukim em i redi tru hia.



Nupela skul bilong dring



Mista Pita Lus

Long namba 5 de bilong mun Februari, Minista bilong Korektiv Institusen na Lika Laisensing, Mista Pita Lus, i bin kirapim wanpela komiti bilong helpim long givim skul ol i kolim "Modaresen Oparesen".

Dispela skul em i bilong helpim ol pipel em ol i save dring planti long Papua Niugini.

Bihain long 2-pela

mun samting, bai dispela skul i stat, bai i gat riim bilong lukim, ol happepa bilong ritim na tu redio bai i brotkas long ol toktok bilong dring.

Pasin bilong dring spak i save bringim pait, kamap rabisman, trabel na ol arapela samting olsem. Long ol happepa bilong skul, bai ol i rait long tok Inglis, Motu na Pisin. Olsem tasol bai ol pipel i ken lainim hariap.

Saut Pasifik Breweri i bin givim K150,000 bilong dispela skul. Siaman bilong skul em Mista John Nilkare. Em hia nem bilong ol arapela memba bilong komiti:

Namba tu Siaman, Mista Luke Sela, Mista K. Lofena, Mista V. Tauni, Mista L. Korema, Mista J. Bitu, Mista E. Silachot, na Misis Liosi na Mista V. Frank. Dispela em i gutpela skul Pita Lus i laik statim.

Wokim pinat bata faktori



Mista Julius Chan

Long namba 13 de bilong mun Februari, Minista bilong Fainens, Mista Julius Chan, i bin tok olsem, bai ol i wokim wanpela nupela faktori bilong wokim pinat bata long Kaia-pit insait long Morobe Provins.

Atsera Kopretiv Limitet i bin kisim tok orait olsem Viles Ekonomik Divalopmen Fan na Papua Niugini Divalop-


men Beng, bai i helpim na givim sampela mani long wokim dispela faktori bilong pinat bata.

Mista Chan i bin tok olsem, wok bilong kamapim kopra, kopi na pinat i wanpela impoten samting long PNG.

Bisnis bilong wokim pinat bata em i gutpela tru, long wanem, pinat i save givim planti strong long bodi, na tu kos bilong en bai i no antap tumas.

Mista Chan i bin tok tu olsem, yumi ken baim pinat long Hailans bilong wokim bisnis i go het gut. Dipatmen bilong Bisnis Divalopmen i sambai pinis long helpim, olsem i no gat wari long dispela.

Mista Chan i bin amamas tru long lukim PNG Divalopmen Beng i helpim long kirapim bisnis bilong wokim ol pinat bata hia long PNG.



I no longtaim i go pinis, wanpela lain saveman bilong Australia ol i kolim ol saientis bilong lain ya ol i kolim ol olsem Australian Komonwelt Sientifik na Industrial Rises Oganaisesen, i bin pinisim wanpela spesel lukluk raun bilong ol hia insait long kantri bilong yumi.

Ol saveman hia i bin traim long painim ol sampela hap i gat gutpela graun bilong kirapim wok egrikalsa i go het long PNG long bihaintaim.

* Poto i soim ol ples em ol i bin lukluk raun.

Klostu 10,000 tisa

Kain Skul	Ol Tisa
P.T. Skul	7544
P.A. Skul	280
PNG Haiskul	1144


Arapela Haiskul	86
Sinia Haiskul	52
Teknikal Skul	263
Skulanka	17
Vokesenel	306
Tisa Koles	166

SINGER

*A Trademark of The Singer Company



PREN BILONG YU INAP OLTAIM



Sampela bikpela siosman kibung wantaim ol kristen wansolwara

Long Janueri 57 deliget bilong olgeta sios bilong planti kantri wansolwara i bin mekim bikpela kibung tru long Port Moresby, em i bin kolim PASIFIK KAUNSI BILONG OL SIOS.

Hia long dispela pes mipela i soim poto bilong sampela bikpela lida na siosman bilong ol sampela ailan nabaut long mipela hia long biksolwara.

Bihain long dispela kibung ol i gat wanpela bilong Papua Niugini stret long Popondetta.

As tingting na aidia bilong dispela konpres em long painim planti we bilong ol sios i ken helpim ol pipel long ples. Em hia sampela aidia:

- (1) Sios i no mas helpim lotu tasol; em i mas go insait na helpim sindaun bilong olgeta man.
- (2) Soim ol pipel long ol pasin bilong kirapim lida lainim pasin bilong insait long olkain wok.
- (3) Go ausait long taun; helpim ol man long ples.
- (4) Yusim ol tul samting i pas tru long PNG.

(Olgeta-poto Mista David Williams i wokim.)

(Antap lephan tru) Mista (Raithan antap) PASTO KAENE IHAGE bilong kantri POSENAI MUSU, seketeri bilong Pasifik Kaunsi Bilong Ol Lotu. (P.C.C.)




(Paunbilo lephan tru) Bisop AMINIASI QALE bilong Yunaitet Sios.

(Raithan daunbilo) PASTO KINGSLEY GEGEYO, eksekutiv ofisa bilong Melanesian Kaunsi Bilong Ol Lotu, em i bilas pinis bilong mekim sampela singsing tumbuna.

(Lephan antap) PASTO SITI-VINI RATUVILI i givim bikpela tok long "God i gat w nem wok long laip bilong y mi"

(Aninit) Bisop JABEZ BYRCE bilong Engliken Sios bilong Polynesia, nupela siosman bilong Pasifik Kaunsi Bilong Ol Lotu.

(Lephan daunbilo) Mista STANFORD SHAURI, seketeri bilong Asembli bilong olgeta lotu long Tanzania.



NU AILAN PIPEL LUKIM DISPELA PES

..... LONG DISPELA YIA GAVMAN BAI GIVIM K6 MILIEN LONG RURAL DIVELOPMEN FAN. LONG DISPELA PES MIPELA I LAIK TOK SAVE LONG OL MANI I MAS KAMAP LONG SAMPELA PROVINS. TASOL LUKAUT: OL PROVINS I NO BIN MEKIM GUTPELA WOK NA YUSIM GUT OL MANI BILONG NARAPELA YIA NA I NO RAITIM KLIA LONG BUK OL EKSPENS BILONG OL, BAI NO KEN KISIM BIKPELA MANI OLSEM BIPO. NOGUT MANI I LUS OLSEM. NA TU GAVMAN I LUKLUK GUT LONG HAMAS WOK KAUNSI NA OL PIPEL I SAVE MEKIM BILONG YUSIM GUT OL DISPELA MANI. SAPOS OL I LES O SINDAUN NATING, GAVMAN BAI STAPIM MANI NEKS TAIM.

BOSIM WOK	KAIN WOK	KINA			
Sentral NU			"	Kopra Draia Palakau	300
Ailan LGK	Letlet Rot Ekstensen	2,000	"	Frisa Et Pos Wot 10 Erima	450
"	Filim Projekta Lameris	1,200	"	Kopra Draia x 3 Wot II	900
"	Patlangat Ston Masin	100	"	Komyuniti Senta Katelusa	300
"	Lokon Komyuniti Senta	1,100	"	Komyuniti Senta Magien	250
"	Danu Komyuniti Senta	1,100	"	Ston Faktori Palakau	375
"	Lambu Komyuniti Senta	1,100	"	Sen So LamaKunauru	375
"	Banesa/Morai Rot Maragon	1,000	"	Et Pos Emira Wot 10	
"	Kimadan Toilet Haus	400	"	Komyuniti Senta Loaua	3,500
"	Maragat Bris	400	"	Wara Saplai Tabolo	375
"	Ramat Kopra Draia	300	"	Wara Saplai Magien	600
"	Letlet Teng	300	"	Trakta Nai	375
"	Talamut Wara Teng	500	Namatanai LGK	Bas Namatanai De Haiskul	9,000
"	Kabil Wara Teng	400	Namatanai LGK	Baim Gris Bilong Graun	1,000
"	Pinikindu Wara Teng	300	Namatanai LGK	C.M.B. Ejensi Namatanai	
"	Malom Wara Teng	350		Leba	15,000
"	Komalabu A.P.O. Haus	3,500	Namatanai LGK	Ples Balus Sursurunga	2,000
"	Lossu A.P.O. Haus	3,500	Namatanai LGK	Komyuniti Helt Senta	
"	Lenkamen A.P.O. Haus	3,500		Silur	2,000
"	Kono Tisa Haus	-	Namatanai LGK	Minias/Kambirara Rot	6,000
"	Patlangat Komyuniti		Namatanai LGK	Trakta/Trela Malendock	
"	Senta	1,100		Ailan	5,000
"	Niruaram Komyuniti Senta	1,100	Namatanai LGK	Stairway Masahet Ailan	1,000
"	Lokon Et Pos Wara Teng	350	Namatanai LGK	Causeway Nansau Riva	6,000
"	Dalom A.P.O. Haus	3,500	Namatanai LGK	Trakta/Trela Rei	5,000
Tikana LGK	Klasrum Nusalawa	2,000	Namatanai LGK	Trakta/Trela Warangansu	3,096
Tikana LGK	Paul Haus Eruk	500	Nu Hanova LGK	Puas/Meterankasan Rot	
Tikana LGK	Et Pos Kabien	1,000		Levalai/Kubrukruk Sek.	5,000
Tikana LGK	Lamusmus/Silacui Rot	5,000	Nu Hanova LGK	Helt Senta Haus Kuk	
Tikana LGK	Trakta/Trela Wot 5	5,000		Lavongai	400
Tikana LGK	Kopra Haus Sumuna	1,000	Nu Hanova LGK	Ples Balus Lavongai	2,349
Tikana LGK	Baim Gris Bilong Graun	1,000	Nu Hanova LGK	Ples Balus Puas	1,500
Tikana LGK	Omo/Maion Rot	1,500	Nu Hanova LGK	Puas/Meterankasan Rot	
Tikana LGK	Pik Lossuk	1,000		Puas/Levalai Seksen	5,000
Tikana LGK	Bulmakau Projek Wanga-		Nu Hanova LGK	Puas/Meterankasan Rot	
	rarum	1,600		Vangangikiua/Meteran-	
Tikana LGK	Trening Centa Lemakot	1,500		kasing Seksen	5,000
Tikana LGK	Trakta/Trela Bina Grup	5,000	Nu Hanova LGK	Meterankasing/Noi Puas	
Tikana LGK	Tisa Haus Fissoa	2,000		Rot Meterankasing/	
Tikana LGK	Bol/Unon Rot	1,500		Tingalaun Riva Seksen	5,000
Tikana LGK	Banisim Kavieng Maket	1,000	Nu Hanova LGK	Hostel, Taskul	1,500
Tikana LGK	Panapai/Kableman Rot	2,000	Nu Hanova LGK	Egrikalsaral Saplai	
Tikana LGK	Wara Saplai Eruk	700		A.F.A. Rais Famas Aso.	3,380
Tikana LGK	Paul Mangai Haiskul	2,042	Tutu Isukul		
Tikana LGK	Paul Utu Haiskul	600	Asosiesen	Metervoe/Lavongai Rot	3,750
Tikana LGK	Rotari Mongop Haiskul	750	Tutu Isukul		
Tikana LGK	Kopra Draia Kabien	400	Asosiesen	Metemana Riva Bris	4,000
Tikana LGK	Rot Mentenens Lamusmus	1,000	Tutu Isukul		
Tikana LGK	Haus Kaving Panameko	746	Asosiesen	Metekavil Riva Bris	1,776
Mussau/Emira			Eria Atoriti	Frisa Wok	5,496
LGK	Trakta Katelusa	3,250			
"	Kopra Stua Haus Palakau	1,000			
"	Fiul Dipot Lovarang	750			
"	Trakta Lomaku/Maroi	3,250			
"	Haus Tisa Loaua	450			
				TOTAL	<u>K185,906</u>

Nau i gat bikpela tambu long paitim ol manki i stap long skul. Edukesen dipatmen i no laik. Tisa i mas mekim bikhetman i katim gras na klinim skul.



* Dispela piksa i soim ol lain didiman i holim wanpela wail bikbel long bus bilong Alexishafen, klostu long Madang. Bipo long ol i bringim em i go long ka, ol i givim em sut i gat marasin bilong lusim strong, na bai em i slip isi tasol.



* Lukim ol dispela 30 man i bin karim bikpela wail bikbel i goap na i go daun long maunten. Ol lain man hia i wokabaut longwe tru long ka, samting olsem 150 yat longwe. Ol i taitim bun stret.

Madang wari long ol bikbel lang

Ol lain man i stap insait long ketelmen asosiesen i gat wari long ol bulmakau bilong ol. Ol i no i stap gut. Ol i save kamap bun nating oltaim.

As bilong trabel em long ol lang nogut yumi i save kolim ol bikbel lang, ol i save dringim blut bilong ol bulmakau na skin bilong ol i save skrap skrap tasol oltaim.


Long stopim dispela trabel, ol lain bilong didiman i laik banisim ol wail bikbel i stap long Alexishafen. Na taim ol dispela bikbel i stap insait long banis, em i isi moa long spreim marasin i save kilim i dai ol bikbel lang.

Ol i laik skulim ol bikbel long ol sampela wok, olsem wok bilong graun olsem trakta i save mekim wok long ol fam.

Trakta i gutpela tasol em i yusim planti disolin na tu, em i save bruk na i no gat planti mekanik bilong stretim ol. Na trakta i no save karim pikinini. Bikbel i ken helpim long planti yia long wok gaden, na em i no save yusim disolin o petrol. Em i save kaikai gras tasol. Na long taim em i lapun, yu ken kilim em na kaikaim mit bilong em, na pikinini bilong em i ken wok moa. Ating bikbel i gutpela moa olsem trakta.



* Lukim antap: Sapos yu pren bilong mi, bai yu kaikai planti gutpela gras long banis. Bihain long 4-pela de, wail bikbel i no moa bikhet.



“Coke em i samting tru”



N.G.I. INDUSTRIES LAE, AUTHORISED BOTTLERS OF COCA-COLA AND FANTA.



* Dispela poto hia i soim yumi piksa bilong wanpela blakbokis man ol i kolim Kumbui. Wanpela man bilong ples Simbian nem bilong em Linus Kambu i bin wokim long strongpela diwai ol i kolim Miamba. Nau blakbokis hia i redi tru long flai.

Bipo long taim bilong tumbuna, ol i save wokim dispela kain kaving long ol kanda tasol. Dispela em i namba wan taim tru nau wanpela man bilong lain bilong mipela i wokim tru wanpela i kamap.

Sapos yu go raun long sampela hap bilong Sepik yu inap painim planiti planti moa. Ol i save flai antap long klaut long taim bilong apinun tasol.

Ol i save i stap longwe tru long ples, klostu long ol bikpela raunwara bilong painim ol pis. Antap long het bilong em yupela i ken lukim bikman ya i putim skin bilong kapul olsem bilas.

Karawari senta

Ol Karawari pipel long hap bilong Amboin, long Angoram Sab Provins, i gat nupela komyuniti senta bilong ol.

Ol pipel yet wantaim helpim i kam long gavman, i bin wokim dispela nupela senta. Em i no kostim mani long ol long wokim. Ol pipel i save yusim fri taim bilong ol long mekim em i kamap gut.

Nau ol i save yusim dispela senta long danis, mekim kibung, na lainim ol meri long pasin bilong samap na kukim kaikai, na ol arapela kain samting olsem.

Meri bilong Mista Fred Wade, OIC bilong Amboin Patrol Pos, Misiş Tessy Wade, i tok olsem, em i amamas tru long lukim dispela wok i stat long dispela hap long lainim ol meri long olkain wok. Nau yet ol i wok long painim mani yet long baim sampela masin bilong samap, bai ol i ken trenim ol meri Karawari.

Misis Wade i tok tu olsem, em bai i lainim ol meri long kukim ol gutpela kaikai tasol bilong givim strong long bodi bilong olgeta famili na bai ol i kamap strongpela.

Aitape maket

Gavman Fres Fud Maket long Aitape i wok long i go het gut long wok bisnis bilong en. Dipatmen bilong Didiman i bin statim long las yia.

Fres Fud- em i min nupela kaikai nau tasol ol i kamautim long ol gaden.

Wanpela Rural Developmen Ofisa i wok nau long Aitape, Mista Francis Mingila, i tok olsem, ol skul na ol sampela institusen long dispela hap i bin baim pinis samting olsem 50,000 paun ol kain kain kumu na ol sayor em ol pipel i save groim long ol gaden.

Dipatmen hia i bin helpim tu ol pipel long Pes Setelmen long wokim gaden na long planim ol dispela kain kain kaikai bilong salim long Aitape na ol pipel i ken baim.

Ol i save salim kabis, tamato, na sampela arapela moa.

Tupela lain hia, em Aitape Haiskul, na Aitape Vokesenel Senta, i save baim planti long ol dispela kaikai hia.

Tasol ol ofisa bilong DASF i no save i gat inap transport long go aut long ol vi-les long baim ol kaikai ya.

Provinsal Komisina bilong Is Sepik, Mista Tony Bais, i bin opim tru nupela Rural Helt Senta long Wombisa long Maprik Sab Provins, long namba 23 de bilong mun Desember long yia i go pinis. I gat 20 bet rum i stap. Em i kos samting olsem K8,000.

Provinsal Helt Ofisa bilong Is Sepik, Dokta Kevin Farrell tu i bin i stap long taim ol i mekim dispela opening seremoni na i tenkim ol pipel long gutpela wok bilong ol long kirapim dispela helt senta bilong ol, bipo long ol i askim long kisim helpikam long gavman.

Em i tokim ol pipel olsem, em bai i askim gavman long bikpela Woks Progrem bilong 1976 na 1977 long kirapim ol sampela kain fan o we bilong kisim moa mani long wokim gutpela ples bilong pasim ol sua na kisim marasin, medikal stua, klinik, na ofis, haus kuk, toilet, na haus waswas, long dispela senta.

Dispela Wombisa Rural Helt Senta i gat nem bilong em tru ol i kolim Peter Apien Wod. Peter Apien i kam long Maprik. Em i namba wan man olsem etpos odeli long kirapim ol etpos long hap bilong Wosera long 1964, na em yet

i bin toktok wantaim olgeta kaunsila long askim gavman long kirapim wanpela rural helt senta long Wombisa yet. Olsem na ol i givim nem bilong em long dispela senta.

Long 1970, Peter Apien i bin putim 50 toea long tras fan na em i go askim ol pipel long ol ples long givim sampela mani long kirapim dispela Wombisa Helt Senta.

Long wanpela toktok bilong em, Mista Apien i tok olsem, em i givim bikpela tok tenkyu long gavman long dispela bikpela helpim em i givim long ol pipel bilong Wosera.

Wosera stret i gat populasen inap long 22,000 pipel olgeta. Olsem na ol i mas i gat wanpela rural helt senta bilong ol stret. Ol liklik et pos ol i gat planti liklik. Maprik em i longwe liklik long bringim ol sik pipel em ol i laik dai klostu tru. Olsem na nau ol bai go long Wombisa tasol.

Long Wewak Praim Minista i tokaut olsem: Developmen bilong pipel, em ol pipel yet i mas mekim. Yumi save toktok planti long developmen tasol yumi yet i wok liklik tasol.

TOK I NO DAI LONG GRAUN

Dia Edita- O yes nau mi i gat bikpela wari tru, long dispela K100,000 mani Gavman i salimikam long stretim wari bilong ol papa bilong graun insait long Wewak taun.

Tasol mi wanpela papa bilong graun sait long Kaindi Tisa Koles i stap. Mi putim kontrak nem nating bilong mi long pepa bilong gavman long kisim K10,000 kina long namba 20 Novemba 1975.

Mi no kisim dispela K10,000 mi promis nating long kisim.


Mipela i gat 15 papa bilong graun long kisim dispela mani. Mi makim kontrak na 14 arapela papa bilong graun ol i tilim nabaut pinis dispela K100,000 tausen kina. Ol i no givim long mi H. Movia Jipiare. Mi no gat tru. Dispela mani mi gat bikpela wari.

H.M. Jipiare,
Kainde/Wewak.



* Wewak Wamamba, em i namba wan man i sainim kontrak; em tu i kisim sek inap long K100,000.

KAVIENG I GAT NEM LONG HUKIM PLANTI ATUN



* Em poto bilong sampela naispela atun pis.

Long Nago Ailan klostu long Kavieng inap 5 yia nau wanpela faktori bilong smokim na aisim pis i wok gut tru.

Em i wanpela bisnis we ol Japan na ol lokal pipel i wok wantaim. I gat wanpela bikpela sip mama inap 13,000 tan na 13 smolpela wokbot.

Wok i go olsem. Ol smolpela wokbot i goaut long bikpela solwara inap 25 mail. Ol boskru i tromoim sampela smolpela pis i go daun long wara na olsem ol bikpela atun i swim i kam klostu long wokbot. Nau ol wokman i hukim ol long huk nating; ol i no putim abus long huk. Sapos bot bilong ol i pulap pinis ol i ran i kam long sip mama we ol i putim insait long tupela tang i save aisim ol pis. Bihain long 10-pela aua pi i olsem hap ais

tru; na ol i putim long bikpela bakstua insait long sip mama. Olsem em i ken i stap inap i mun.

Sampela pis ol i bringim i go long faktori bilong smokim na putim long tin. Olgeta de wanpela pang i bringim 12 tan atun i go long faktori. Em i moa olsem 24,000 paun pis. Man, planti moa.

Long sip mama i gat 13 Japan na 35 lokal man i wok; long faktori i gat 3-pela Japan na 65 lokal man; long ol liklik wokbot bilong hukim pis i gat 50 lokal man na 120 ol Japan i mekim wok.

Faktori i salim pis i go long Japan na Amerika na long 1974 ol i bin salim 2,000 tan long Australia. Faktori i save bringim pis tu i go long ol haikul long Nu Ailan.

Kampani bilong Japan i ranim dispela kampani i laik bai gavman na ol pipel i ken baim sea insait long en.

Bikpela wari long kopra

Em hia sampela toktok i kam long Minista bilong Praimeri Indastri, Mista Boyamo Sali, i toktok long bikpela wari bilong kopra hia long kantri bilong yumi.


Mista Sali i tok stat long Desemba las yia i kam inap long mun Februeri long dispela yia,


PNG i bin salim liklik namba tru bilong kopra.

Long Janueri yumi i bin salim 9,000 tan, na long Februeri yumi i salim 1,600 tan kopra tasol long wol maket.

Em i tok as bilong trabel, i gat sampela samting i rong long wetta na prais i daun tru.

YAMAHA
 YAMAHA





YAMAHA

ELA
MOTORS LIMITED

**Burns
Philp**
GROUP OF COMPANIES

YAMAHA
 YAMAHA

The Phantom

®

By Lee Falk and Sy Barry

LONGWE LONG AMERIKA DIANA I RAITIM PAS

Darling

Lewa bilong mi, Longtaim tumas mi no bin lukim yu. Wataim bai mi lukim yu gen? Mi krai long yu. Mi Diana

Diana

Mi hop bai em i kisim dispela pas...

PAS I KAMAP

'Em wanela pas i bin kamap long Mista Walker.

Em i husat?

'O, mi no save.

FALK & BARRY 8/26

*FOR THE GHOST WHO WALKS.

DIANA LONG AMERIKA,

Bai pas i ken kamap?

Mullikin Box 7

WANPELA MAN LONG BUS I KARIM PAS I GO...

Lukaut long pas i go long EM...

Mi save pinis

LONG BIKPELA TAIS MONKI I KISIM I GO

FALK & BARRY 8/27

Mullikin Box 7

INSAIT LONG BIKBUS 205!

INSAIT LONG BUS

Lukim, monki ya i karim pas i kam

Gutpela.

Ating ol bikpela man i wetim yu long kibung?

Nius i nogut?

FALK & BARRY 8/28

*FOR THE GHOST WHO WALKS.

Ol pipel long i hepi tru yu bin bekim tambaran bilong ol.

FALK & BARRY 8/29

'Ol i tok klostu yu indai long kisim bek tambaran ya.

TRUE.

FALK & BARRY 8/29

Kas bilong yu Bilong wanem yu no hepi?

Mi hepi.

BEGINNING: THE NORMAL LIFE.

Nupela lo marit

Long Goroka wanpela miting bilong ol man i wari long planti pipel tumas i kam insait long taun, i gat nupela tingting long marit.

Ol i laikim olgeta pipel i mas marit long haus lotu na ol i mas kisim setifiket.

Na pe bilong meri i mas K500 stret na dispela pe i olsem simen i pasim lain bilong man na lain bilong meri bai tupela i no ken kalapim marit kwiktam.


Setifiket bilong marit oli mas ken kisim long ol misin o gavman o welfe ofis.

Air Niugini gat smokbalus nau

Long Fonde, 12 Februari, Air Niugini wantaim nupela smokbalus bilong en, i bin statim ron namel long Australia na long Filipin Ailan.

Kepten na ol ofisa ol i bilong Englan. I gat 13 PNG meri i tren pinis long hostes. Sampela arapela hostes em ol i bilong Filipin Ailan.

Pasim planti trak



Mista Bruce Jephcott

Minista bilong Transport, Mista Bruce Jephcott, nau i mekim Pen T i pasim planti trak long wanem planti mani

tumas i lus long planti wokman i ran nating na i raun wantaim ol trak na ka bilong gavman.

Gavman i gat planti trak tumas na em i laik salim sampela.

Na dispela dipatmen i bin rausim planti wokman long wanem em i sot long pe na i no gat wok.

Planti wari na hevi i bin kamap long sampela dipatmen long wanem ol Pen Tibin rausim sampela ka bilong ol. Long sampela taun ol plis na ol medikal ofisa i bel nogut tru long dispela.

Lae pawa sot

I no longtaim i go pinis, ol i bin stat long salim lektrik pawa long nupela haidro long Ramu klostu long Yonki, i kam inap long Lae.


Tasol planti taim tumas lait i dai na ol man i stap long tudak na ol masin i pas i stap na ol faktori i no ken wok. Wanpela man i gat bisnis long kamapim ol pikinini kakaruk na taim pawa i dai ol 6000 liklik kakaruk i dai.

Planti manmeri long Lae i singaut long gavman i mas bekim ol samting i lus o bagarap pinis taim pawa i no ran gut.

Mista Donatus Mola, Minista bilong bosim ol pawa olsem, i tok ol masin long Yonki i stat nau tasol long ran na i gat wan wan liklik asua yet i stap long ol masin; olsem na sampela taim pawa i no kamap.

Planti pipel long Lae i no bin baim pawa bilong ol.

I LUK OLSEM BAI PRAIS BILONG KOPI I GO ANTAP MOA YET. AIS I PUNDAUN LONG BRASIL: GURIA I BAGARAPIM GUATEMALA. MAKET I WETIM PAPUA NIUGINI.



Mista Paul Sango

Dairekta bilong Edukesen, Mista Alkan Tololo, i bin makim Mista Paul Sango olsem helpman bilong Namba wan Asisten Dairekta bilong Edukesen Dipatmen.

Mista Sango i gat 31 krismas, i marit, na i gat wanpela pikinini. Mista Sango i kam long Ponam Ailan long Manus Provins. Em i skul long Ponam na Bundralis Katolik Praimeri Skul. Na bihain em i go long Vuvu Haiskul long Is Nu Briten Provins. Long yia 1963 na 1964 em i bin mekim kos long Sen Paul Tisa Koles long Vunakanau.

Mista Sango i bin wok wantaim dipatmen bilong edukesen inap 10-pela yia olgeta, olsem praimeritisa, hetmasta, inspekta, na Provinsal Superintenden long sampela provins. Em i kamap long hetkota long Moresby long 1973.

Gavman i wari long ol fama i no bin wokim kopra na kopra kontrak bilong PNG i laik bagarap. Tasol prais i daun tru tru na ol man i les.

BAIM WANTOK

Sapos yu wanpela yu laik kisim WANTOK i kam long yu stret, orait yu salim dispela tiket i kam:

Mi laik kisim WANTOK niuspepa inap wan yia olgeta. Nau mi salim K5 (\$5.00) i kam;

Nem:

Adres:

Salim i kam long:

WANTOK - P.O. BOX 396 - WEWAK

OL KAIN KAIN KAIKAI

EM HIA NEM BILONG SAMPELA KAIN KAIN KAIKAI BODI I LAIK-IM TUMAS.

mi save dringim, em wanpela kain tasol. I gat kain suga tu long kaukau, taro, yam, na rais na bret.

PROTIN - em yumi ken painim insait long mit na pis na bin na kasang. Na liklik protin tu i stap insait long kaukau na kumu.

GRIS - em i wankain long suga long wanem em i gat planti kalori; tasol gris em i strong na inap stap longtaim. Gris tu i olsem strongpela bensin. Gris yumi painim long mit na bata na galip, na kokonas na kasang o pinat, long soya bin na pikinini bilong karuka.

Protin em i wanpela kaikai bodi i mas gat bilong mekim yumi gro na kamap strong bilong stretim ol bagarap i stap insait long bodi. Protin i save pait tu egens long ol sik. Em i stap tu insait long susu bilong mama bilong helpim bebi i gro gut tru.

Bikos planti pipel bilong PNG i no gat gris long bodi bilong ol - ol i bun nating - ol nau i mas kisim planti moa kaikai olsem waitman.

KALORI - em i no wanpela kaikai. Em i olsem bensin long bodi, i mekim bodi i ran na i mekim wok bilong en. Taim yumi pinisim wok, ol kalori tu i pinis; olsem na yumi les na tait na hangre tu.

OL MINERAL - em ol marasin samting bilong graun, olsem sol na ain na yot na kambang. Dispela ol samting i strongim tit na bun na i mekim blut i retpela tru. Retpela blut inap long karim planti win i go long olgeta hap bodi i save yusim ol kalori long mekim wok.

Long wanpela de yumi save yusim inap long 3000 kalori. Han lek i mov, hat i pampim blut, ai i wok, tang i wok - ol dispela samting i mas gat bensin o kalori bilong en.

VITAMIN - em i no wanpela kaikai; em i wanpela kain marasin i save pasim kaikai wantaim bodi, bai em i ken yusim gut.


Em hia wanpela eksampel: sapos skulboi i wok about inap 20 minit long kam long skul, em i bin pinisim olgeta kalori em i bin kisim long dispela kaukau em i bin kaikai long moningtaim. Sapos em i bin kaikai wanpela kaukau tasol, nau em i hangre na em i no inap stadi.

Vitamin em i olsem huk i save pasin tupela hap bilong pulsen. Sapos huk i no stap, yu no ken pasim tupela hap; pulsen i nogut. Sapos vitamin i no stap, bodi i no ken yusim gut kaikai.

SUGA - em i kaikai i holim ol dispela kalori. Stik suga yu-

Vitamin yu ken kisim long ol kain kain prut olsem muli na banana na mango na grin samting.

(Daunbilo) Protin ya i save paitim olkain sik.



(Daunbilo) Sampela protin bilong mekim bodi i gro



(Daunbilo) Suga i olsem bensin bilong mekim wok.



Ol poto na tok long dispela pes i kam long wanpela nupela buk ol i kolim LIKLIK BUK BILONG OL KAIN KAIN SAMTING. Em i smatpela tru; tok inglis bilong em i no hat tumas. Yu ken kisim long:

Office of Agricultural Secretary
Melanesian Council of Churches
P.O. Box 80, LAE

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.